

EUROPE

Firmât a Lubiane un acuardi cul Istitût nazionâl di chimiche de Slovenie.


Cooperazion sientifiche cence confins

La Universitât di Udin e à viert une colaborazion sientifiche cul Istitût nazionâl di chimiche de Slovenie (Nic) inte suaze di progjets di ricercje europeans, di cors di lauree e di dotorât e de mobilitât dai ricercjadôrs, intai setôrs des nanotecnologjii, dai materiâi, de chimiche e biochimiche, e de ingegnarie chimiche. L'acuardi di suaze di cooperazion tra lis dôs istituzions al è stât firmât a Lubiane dal retôr dal Ateneu furlan, Alberto Felice De Toni,

e dal diretôr dal Istitût sloven, Janko Jamnik, in presince de Ambascadore di Italie in Slovenie, Rossella Franchini Sherifis, e dal responsabil dal Istitût talian di culture di Lubiane, Angelo Izzo. Lis ativitâts in cooperazion fra Udin e Lubiane a scomençaran za in chescj mês. Tacant dal procès di internazionalizazion dai cors di studi dal Ateneu furlan, in particolâr cun seminaris di "visiting scientists" intal cors di lauree magjistrâl in Inzegnarie pal ambient e pe energie, tal cors di

dotorât in Siencis de ingegnarie energjetiche e ambientâl e ta chei altris dotorâts di aree sientifiche e tecnologjiche. L'Istitût nazionâl di chimiche di Lubiane al è une istituzion sientifiche di nivel internazionâl, leader in Slovenie inte alte formazion e inte ricercje; a lavorin plui o mancul 260 sienziâts, un cuart di lôr a son zovins ricercjadôrs. "Al è un prin fundamentâl acuardi – al à sclarît il retôr De Toni – cul obietîf di slargjâlu in curt a altris istituzions sientifichis impuartantis

slovenis e ae Universitât di Lubiane, intal quadri de nestre strategjie di internazionalizazion des ativitâts didatichis e di ricercje, specie intai setôrs plui ae avanvuardie e di frontiere che a segnaran il futûr za intai agns prossims". "La colaborazion – al à sottolineât il diretôr dal dipartiment di Chimiche, Fisiche e Ambient, Alessandro Trovarelli – al permet l'acès dai nestrîs ricercjadôrs a une istituzion cuntun potenzial di strumentazion ae avanvuardie in setôrs strategjics pal Ateneu e al



darà la pussibilitât di svilupâ progjets zontâts inte prospetive dai bants dal program european Horizon 2020". L'Istitût nazionâl di chimiche di Lubiane al è atîf inte ricercje di base e aplicade, orientade aes biotecnologjii, ae protezion ambientâl, ae chimiche, ae ricercje sui materiâi, ae ingegnarie chimiche.